



Ika-Tulong Dominggo sa Adbyento –
Dominggo sa Paglipay
Disyembre 14, 2014

Ma-Dominggong Tamdanang Liturhikal alang sa Simbahan sa Kabus sa Diwa sa Bag-ong Ebanghelisasyon

Ang Simbahan sa Kabus, diha sa Gagmayng Simbahanong Katilingban, magpuyo sa bag-ong kasaysayan sa kaluwasan kon malipayon niyang ilhon si Jesus diha sa mga kabus isip mga alternatibo sa Diyos.

Subay sa atong dagang karon: Ang Simbahan sa Kabus, diha sa Gagmayng Simbahanong Katilingban, magpuyo sa bag-ong kasaysayan sa kaluwasan kon malipayon niyang ilhon si Jesus diha sa mga kabus isip mga alternatibo sa Diyos, ipadayon nato ang pagpamalandong sa panglantaw sa PKP-II sa Simbahang Nagbag-o nga nagtutok karon sa Pagka-disipulo diha sa Katilingban. Sa konteksto sa Simbahan isip Katilingbang-anaa-sa-misyon, siya karon nagahisgot mahitungod sa “atong misyonerong bokasyon”.

“K.3 Ang Katilingbang-anaa-sa-Misyon

A) Ang Atong Misyonerong Bokasyon

(108) Mibanagbanag usab kanato ang nagtubong kahimatngon sa misyonerong katakus sa mga mamumuong migranteng Pilipino didto sa gawas. Tungod sa hinungdang pang-ekonomiya, nagpanon ang mga Pilipinong nangita ug trabaho didto sa ubang mga nasud. Didto nagasaksi sila pinaagi sa ilang pagka-relihiyoso ug pagka-magtotoo kon ugaling mahimo man kini nila. Daghan ang mga sugilanon bahin sa mga positibong epekto sa ilang pagsaksi sa pagtoo ngadto sa uban. Giingnan ni Santo Papa Juan Pablo II ang mga Pilipinong mamumuong

mitabok sa mga kadagatan kaniadtong 1987: ‘Sa pagkatinuod, sa Europa gitawag kamo aron maoy mga bag-o ug batan-ong mga saksi nianang pagtoo nga nadawat sa inyong nasud nga gikan rausab sa Europa kapid-an na ka mga henerasyon ang milabay.’ Kinahanglang lig-onon kining pagsaksiha pinaagi sa mga nagkadaiyang paagi sama sa takdong katekesis sa dili pa sila molangyaw. Kinahanglan usab natong ipahigayon ang pag-amomang pastoral ug katilingbanon alang kanila ug sa ilang mga banay. Nianang paagiha ang ilang kaayohang kalagnon ug materyal maalagaran, ang ilang mga katungod mapanalipdan, ug ang ilang pagtoo mapalig-on.

(109) Ug dinhi sa atong yuta anaa ang halapad nga wanang alang sa misyon nga may kalabotan sa apostolado alang sa mga Pilipinong Tsino. Ubos sa 20% nga mga Tsino sa Pilipinas ang nakadawat na sa epektibong ebanghelisasyon. Ang kalamboang nakabot sa pagsangyaw pinaagi sa edukasyon ug buhat-pastoral sa apostolado ngadto sa mga Pilipinong Tsino makapadasig kaayo. Kinahanglang ato pa kining pakusgon. Apan kinahanglang molantaw kita latas sa atong mga kabaybayonan ug atong tan-awon ang mga kahigayonan alang sa misyon nga gibuksan na sa mga kaila sa atong mga igsoong Pilipinong Tsino diha sa mga katilingban sa Sidlakang Asya, apil na ang Republika sa Katawhan sa Tsina kansang pagka-abli sa relihiyon nagpabiling layaw. Kinahanglang ihatag nato ang pagdasig, pagpaluyo, ug mga lumilihok alang niining mahinungdanong misyon.”

Da, tan-awa. Ania ra man diay ang panawagan ug hagit. Magpili ka. Mag-misyonero ka. Isip indibiduwal ... isip magtiayon .. isip usa ka banay! Pangahasi! ■

RITO SA PAGSUGOD

(Fil 4:4-5)

Paglipay diha sa Ginoo kanunay; usbon ko pag-ingon, paglipay. Sa pagkatinuod, duol na ang Ginoo.

P: Sa ngalan sa Amahan ug sa Anak ug sa Espiritu Santo.

K: *Amen.*

P: Ang Ginoo maanaa kaninyo.

K: *Maanaa usab kanimo.*

Pasiuna ug Pag-abi-abi

P: Mga igsoon: atong gisaulog karon ang Ika-tulong Dominggo sa Adbyento. Kini ang Dominggo sa Paglipay, nga gipaila sa bulok nga rosas. Maglipay kita kay haduol na ang Ginoo! Hangyoon nato ang Ginoo nga iya kitang himoong takus nga mosaulog sa adlawng natawhan sa iyang Anak ug mangandam sa iyang pagbalik pinaagi sa pagpukaw kanato sa atong bag-ong kahimatngon bahin sa misyon, sa mas halawom nga pagpanag-uban sa katawhan ug sa mas malipayong pag-ila sa presensya ni Jesus uban sa mga kabus isip timaan sa pakigbangi sa Diyos.

Pagbendita sa Purongpurong sa Adbyento

Ginoong Diyos, ang imong Simbahan malipayong nagpaabot sa pag-anhi sa iyang Manluluwas, kinsa maoy naghatag ug kahayag sa among mga kasingkasing ug nagpapha sa kangitngit sa kawalay-alamag ug sala.

(Pagdagkot sa Tulo ka Kandila) Ibubo ang imong mga panalangin ngari kanamo sa among pagdagkot sa kandila niining purongpurong; hinaut nga ang iyang kahayag mosidlak sa silaw ni Kristo, kinsa mao ang Ginoo, hangtud sa kahangtoran.

T: *Amen.*

Akto sa Paghinulsol

P: Mga igsoon: aron takus kitang mosaulog niining mga balaang misteryo, ato karong hinumduman ang atong mga kasal-anan ug

pangayoon nato ang mahigugmaong pasaylo ug kalooy sa atong Diyos.

P: Nagakompisal ako...

K: *Sa Diyos makagagahum sa tanan...nga inyo unta akong iampo sa Ginoo nga atong Diyos.*

P: Kaloy-an unta kita sa Dios nga makagagahum sa tanan ug pasayloon ang atong mga sala, dad-on unta kita niya ngadto sa kinabuhing dayon.

P: Ginoo, kaloy-i kami.

K: *Ginoo, kaloy-i kami.*

P: Kristo, kaloy-i kami.

K: *Kristo, kaloy-i kami.*

P: Ginoo, kaloy-i kami.

K: *Ginoo, kaloy-i kami.*

K: *Amen.*

Kolekta

P: Mag-ampo kita: O Diyos, nakakita ka kon giunsa sa imong katawhan sa pagpaabot nga maunongon sa pangilin sa Pagkahimugso sa Ginoo, ihatag kanamo ang katakus, naga-ampo kami, nga makab-ot ang mga kalipay sa labing banggiitang kaluwasan ug nga masaulog sila kanunay diha sa solemning pagsimba ug masadyang pagmaya. Pinaagi ni Jesukristong among Ginoo, imong Anak, nga buhi ug hari uban kanimo diha sa kahiusahan sa Espiritu Santo, Diyos nga usa hangtud sa kahangturan.

K: *Amen.*

LITURHIYA SA PULONG

Unang Pagbasa: Is 40:1-5,9-11

L: Ang Pagbasa gikan ni Propeta Isayas

(Basahon gikan sa Kasulatan)

L: Ang Pulong sa Ginoo.

K: *Salamat sa Dios.*

Komentaryo sa Is 40:1-5,9-11:

Sa pagbalik sa katawhang Israel ngadto sa ilang yutang natawhan gikan sa ilang pagkabihag sa Babilonya, nasinati nila ang pagkahugno

ug ang nagkagabok nga pag-unong kang Yahweh, inay kalipay ug banggiitang mga paglaom alang sa umaabot. Ngano man? Kay ang mga gisaad sa Ikaduhang Isayas wala man matuman. Natunga sila sa duha ka managsumpaking pundok: ang mga konserbatibong praktikal batok sa mga madamgohong ideyalista. Busa, dinhi mialsa ang propeta aron buhion ang paglaom sa usa ka mas maayong kaugmaon. Iyang gipadayag ang iyang propetikong misyon: ang pagsangyaw sa pag-apil-apil sa Diyos alang sa kabulahanan sa mga kabus, sa mga gipadaplin ug sa mga sinalikway nianang tuig nga Iyang gikahimut-an! Ug miulbo ang propetikong kasadya gikan sa iyang kahiladman: gibag-o siya, gisul-oban na siya sa hustisya nga makaluwas. Ang iyang kaugalingong kasinatian sa pagkabag-o nagsalamin sa pagtukod sa bag-ong Jerusalem, sa kalinaw nga pinasikad sa hustisya alang sa tanang kanasuran!

Salmo Responsoryo: Lukas 1:46-48, 49-50, 53-54

(Basahon gikan sa Kasulatan)

Komentaryo sa Lukas 1:46-48, 49-50, 53-54:

Usa kini ka rebolusyonaryong awit ni Maria, bantugang ginganlan sa tradisyon nga Magnificat, gikan sa unang pulong sa Linatin nga paghubad sa maong awit. Adunay kalihokan sulod sa awit: gikan sa personal nga kasinatian ni Maria sa mga gamhanang buhat sa Diyos ngadto sa unsay gibuhad sa Diyos sa katawhang Israel. Ang kalihokan puno sa mga bangi: ang kasaysayan ginasulat man unta sa mga gamhanan, adunahan ug tinamud nga mga tigmuna sa kultura; apan dili, gipili hinoon sa Diyos si Maria, usa ka wala mailhing kabus nga dalagita aron mahimong inahan nga tighimo sa bag-ong kasaysayan. Sa panagbangi tali sa bahandi ug gahom, sa usa ka bahin, ug sa kabus ug kawalay-gahom, sa laing bahin, gipili sa Diyos ang pagdapig sa mga kabos

ug mga walay-gahom, sa mga biktima sa mga adunahan ug gamhanan, alang sa usa ka bag-ong kasaysayan kansang tumong mao ang kaluwasan. Mao kini ang Diyos nga gitooan ni Maria ug ang kasaysayang iyang gipuy-an.

Ikaduhang Pagbasa: 1 Tes 5:16-24

L: Pagbasa Gikan sa Unang Sulat ni San Pablo ngadto sa mga Taga-Tesalonika

(Basahon gikan sa Kasulatan)

L: Ang Pulong sa Ginoo.

K: *Salamat sa Dios.*

Komentaryo sa 1 Tes 5:16-24:

Sa panapos sa sulat ni Pablo ngadto sa Kristohanong katilingban sa Tesalonika, giawhag niya ang mga tawo sa pagbaton sa Espiritu diha sa ilang mga kinabuhi. Ug ang Espiritu nagpakita sa iyang kaugalingon diha sa kalipay: ang pagmaya mao ang ilhanan sa kinabuhing Kristohanon. Kining kasadya sa Espiritu minggitib gikan sa harmoniya sulod sa katilingbang Kristohanon. Sa panaghiusa sa katawhan ug sa mga nangulo kanila, sa ilang nagkadaiya ug komun nga mga tahas sa pagtambag sa mga wala maglihok, pagdasig sa mga naluyang kasingkasing, sa pagtabang sa mga mahuyang ug pagka-mapailubon ngadto sa tagsa-tagsa. Anaa kini sa pagsaulog sa Eukaristiya ug sa pag-ampo, sa pagpangita sa kaayohan alang sa tanan ug alang sa matag usa diha sa nagkalain-laing mga gasa sa Espiritu, diha sa pagpuyo sa kalinaw ug kabalaan sa Diyos sa diwa, kalag ug lawas.

Berso sa Aleluya:

L: Aleluya, aleluya. R: Aleluya, aleluya!

Ang Espiritu sa Ginoo ania kanako, kay iya akong gidihogan ug lana aron isangyaw ang nindot nga balita ngadto sa mga kabos!

L: Aleluya, aleluya.

Ebanghelyo: Juan 1:6-8,19-28

P: Ang Ginoo maanaa kaminyo.

K: *Maanaa usab kaminyo.*

P: Ang Santos nga Ebanghelyo sumala ni

San Juan.

K: *Himayaon ikaw, O Ginoo.*

(Basahon gikan sa Kasulatan)


P: Ang Ebanghelyo sa Ginoo.

K: *Daygon Ikaw, O Kristo.*

Komentaryo sa Juan 1:6-8,19-28:

Gipadala sa Diyos si Juan Bautista aron tultolan ang kalibutan sa pagtoo kang Jesus, ang kahayag sa kalibutan. Kining kahayag sa kalibutan mopadayag sa laraw sa Diyos alang sa kalibutan. Gipadala sa mga Judiyo ug sa ilang mga kadagkoan sa templo ang usa ka delegasyon ngadto kang Juan Bautista aron sutaon ang iyang pagkatawo. Ang saksi sa Magbubunyang wala magpunting ngadto sa iyang kaugalingon isip Kristo, kon dili ngadto sa laing tawo. Adunay tawo sa ilang taliwala nga wala nila mailhi, ang Kristo!

Ubani si Fr. Ben Alforque, MSC sa Missionaries of the Sacred Heart sa iyang **GOSPEL BREAK**, hamubo apan makalingaw nga video mahitungad sa Ebanghelyo karong Dominggo. Bisitaha ang **gospelbreak.wordpress.com**. o pinagi sa inyong smartphone o tablet i-swipe kini nga QR code.



Please help us continue publishing this Missalette with your donation.

Any amount is appreciated no matter how small.

Thank you!

Account Name:
 Communication Foundation for Asia
 Metrobank V-Mapa, Sta. Mesa, Manila
 Branch:
 SA# 3306-509-480
 BDO Old Sta. Mesa Road, Manila Branch:
 SA# 7090-042-836

Please fax deposit slip to 713-2736
 We are located at # 4427 Old Sta. Mesa St.,
 Sta. Mesa, Manila

Wali: Ang Simbahan sa Kabus, diha sa Gagmayng Simbahanong Katilingban, magpuyo sa bag-ong kasaysayan sa kaluwasan kon malipayon niyang ilhon si Jesus diha sa mga kabus isip mga alternatibo sa Diyos.

Sumadang Mensahe sa mga Pagbasa sa Dominggo	Ang Simbahan sa Kabus: Konkretong Hulagway sa kabus ug sa ilang kahimtang	Mga Puntos para sa Pamalandong/Panawagan/Hagit
<p>Ang Simbahan sa Kabus, diha sa Gagmayng Simbahanong Katilingban, magpuyo sa bag-ong kasaysayan sa kaluwasan kon malipayon niyang ilhon si Jesus diha sa mga kabus isip mga alternatibo sa Diyos.</p>	<p>Unsaon man sa mga kabus sa inyong katilingban, GKK ug paronkiya pagkahimong mga misyonero sa pagtoo dinhi ug didto sa ubang nasud? Unsaon nimo pagtabang kanila nga mahimong tighimo sa kasaysayan sa kaluwasan? Amgo ka ba nga ang pagumol diha sa katolikong pagtoo mao man ang pagkaplag sa Diyos diha sa mga kabus karon?</p>	<p>“Pukawa dinhi kanato ang atong bag-ong kahimatngon bahin sa misyon, sa mas halawom nga pagpanag-uban sa katawhan ug sa mas malipayong pag-ila sa presensya ni Jesus uban sa mga kabus isip timaan sa pakigbangi sa Diyos.</p>

Padayag sa Pagtoo

P: Nagatoo ako...

K: ...Sa Dios ang Amahan ang makagagahum sa tanan, Magbubuhat sa langit ug yuta; nagatoo ako kang Jesukristo, ang Iyang bugtong Anak, atong Ginoo. Gipanamkon Siya sa lalang sa Espiritu Santo, (*Moyukbo ang tanan*) ug natawo gikan ni Maria nga Ulay. Nag-antos Siya sa sugo ni Poncio Pilato,

gilansang sa krus, namatay ug gilubong. Miadto Siya sa mga nangamatay. Sa ikatulong adlaw nabanhaw Siya. Misaka Siya sa langit ug nagalingkod sa too sa Dios, ang Amahan, ang makagagahum sa tanan. Mobalik Siya aron paghukom sa mga buhi ug sa mga minatay. Nagatoo usab ako sa Espiritu Santo, sa santos ug Katoliko nga Simbahan, sa pagpasaylo sa mga sala, sa pagkabanhaw sa lawas, ug sa kinabuhing walay katapusan. Amen.

Mga Katilingbanong Pag-ampo

P: Mga igsoon: atong ibayaw karon ang atong mga kasingkasing ug mga hunahuna ngadto sa Diyos atong Amahan, ug, uban sa tumang kalipay, mapahiubsanon natong ipadayag kaniya ang atong mga pag-ampo. Sa matag pag-ampo kita motubag: Ginoo, himoa kaming malipayong timaan sa panagbangi.

T: Ginoo, himoa kaming malipayong timaan sa panagbangi.

L: Mag-ampo kita alang sa Simbahan: nga isip Simbahan sa Kabus sa tibuok kalibutan, siya unta malig-on pinaagi sa Espiritu Santo sa iyang mapadayonong pagsaksi sa presensya ni Jesus uban sa mga kabus isip malipayong timaan sa panagbangi diha sa pagligid sa kasaysayan sa kaluwasan. Mag-ampo kita sa Ginoo.

T: Ginoo, himoa kaming malipayong timaan sa panagbangi.

L: Alang sa atong Santo Papa Francisco I, sa mga obispo, pari, diyakono, kanilang nanagpuyo sa kinabuhing konsagrado ug sa tanang gitugyanan sa pag-amoma ug pagdumala sa Simbahan isip Katawhan sa Dios: nga, pinaagi sa ilang pag-ambit sa mga pagbati sa kasingkasing ni Jesus, ila untang ipadayon ang pagpangalagad isip mga misyonero sa gugma sa Diyos, sa iyang hustisya ug kalinaw nga makadasig sa uban sa pagpuyo sa kinabuhing misyonero nga masadya, mapangahason ug mamugnaon sa pagsalamin sa alternatibong paghari sa

Diyos. Mag-ampo kita sa Ginoo.

T: Ginoo, himoa kaming malipayong timaan sa panagbangi.

L: Alang sa tanang pangulo sa kalibutan ug sa tanang gitugyanan sa pangagamhanan ug pagdumala sa mga butang sa kalibutan: nga sila unta magpadayon sa pagpausbaw sa kaayohan sa tanan pinaagi sa paghatag ug puluy-anan sa mga mamumuong migrante tabok sa mga kadagatan, nga may kuyog nga kaayohan ug katilingbanong pag-amoma alang kanila ug sa ilang mga banay, pagpanalipod sa ilang mga katungod ug paggarantiya sa kagawasan sa pagsimba ug pagbansay sa pagtoo. Mag-ampo kita sa Ginoo.

T: Ginoo, himoa kaming malipayong timaan sa panagbangi.

L: Alang kanatong tanan, mga lumulupyo sa kalibutan ug sakop sa kalangitan: nga magdinasigay unta kita sa paghanduraw ug sa pagtukod sa usa ka umaabot nga tawhanong katilingban isip komunyong pinaagi sa pag-edukar sa kaugalingon bahin sa katilingbanong kahimtang sa atong katawhan, sa batakang hinungdan sa kawad-on, paghusga nga walay pagsusi, diskriminasyon, pagpadaplin ug pagsalikway sa isigka-tawo ug sa pagpangita'g matarung ug manggi-angayong mga pamaagi sa pagpalambo sa hiniusang kahimtang tawhanon isip mas halawom nga pagpangandam sa dalan sa Ginoo ug sa pagsaulog sa kalipay sa Pasko sa Pagkatawo. Mag-ampo kita sa Ginoo.

T: Ginoo, himoa kaming malipayong timaan sa panagbangi.

L: Alang sa atong mga minahal sa kinabuhi nga milalin na: nga diha sa kapasayloan sa ilang mga sala, maila na unta ang pahulay nga dayon diha sa kasingkasing sa atong Ginoo ug Manluluwas, si Jesukristo. Mag-ampo kita sa Ginoo.

T: Ginoo, himoa kaming malipayong timaan sa panagbangi.

L: Alang sa atong mga espesyal nga mga tinguha, sa kahilom sa atong tagsa-

tagsa ka kasing-kasing, (*mohilum kadiyot*) Mag-ampo kita sa Ginoo.

T: Ginoo, himoa kaming malipayong timaan sa panagbangi.

P: Ginoong Dios sa gugma ug kalooy, patalinghugi ang mga pag-ampo sa imong katawhan. Tabangi kami sa pag-andam sa agianan sa imong Anak sa iyang pag-abot pag-usab nga mahimayaon. Kini among gipangayo pinaagi ni Kristo among Ginoo.

T: Amen.

LITURHIYA SA EUKARISTIYA

Paghalad sa mga Gasa

P: Dayegon ikaw, Ginoong Dios sa tanang kalibutan, kay gikan sa imong kamanggihatagon nadawat namo kining among gihalad kanimo, ang pan nga abut sa yuta ug ginama sa kamot sa mga tawo. Mahimo kini nga kalan-on sa kinabuhi alang kanamo.

K: Daygon ang Dios hangtod sa kahangturan.

P: Dayegon ikaw, Ginoong Dios sa tanang kalibutan, kay gikan sa imong kamanggihatagon nadawat namo kining among gihalad kanimo, ang bino nga abut sa yuta ug ginama sa kamot sa mga tawo. Mahimo kini nga ilimnon nga espirituhanon alang kanamo.

K: Daygon ang Dios hangtod sa kahangturan.

P: Mga igsoon, pag-ampo kamo, aron ang ako ug ang inyong sakripisyo dawaton unta sa Dios nga Amahan, makagagahom sa tanan.

K: Dawaton unta sa Ginoo ang sakripisyo gikan sa imong mga kamot; alang sa pagdayeg ug paghimaya sa iyang ngalan, alang usab sa atong kapuslanan ug sa tibuok niyang santos nga Simbahan.

Pag-ampo Alang sa Mga Halad

P: Hinaut nga kining sakripisyo sa among pagsimba, Ginoo, naga-ampo kami, maihalad kanimo sa walay

hunong, aron hingpitan ang gipasiugdahan diha sa balaang misterio ug gamhanang matuman alang kanamo ang imong buhat sa pagpangluwas. Pinaagi ni Kristo nga among Ginoo.

K: Amen.

Prepasyo

P: Ang Ginoo maanaa kaninyo.

K: Maanaa usab kanimo.

P: Ibayaw ang inyong mga kasingkasing.

K: Amo nang gibayaw ngadto sa Ginoo.

P: Magpasalamat kita sa Ginoong atong Dios.

K: Angay ug matarong.

P: Angay ug matarung gayud, sibo ug makaluwas, kanunay ug sa tanang dapit nga magpasalamat kami kanimo, Ginoo, santos nga Amahan, labawng makagagahom ug walay-kinutubang Diyos pinaagi ni Kristo among Ginoo.

Kay ang tanang mga panagna sa mga propeta nagatumong kaniya, ang Putling Inahan gihidlaw kaniya pinaagi sa gugmang dili matukib, giawit ni Juan Bautista ang iyang pag-anhi ug gisangyaw ang iyang presensya diha sa pag-abot na niya.

Tungod kini sa iyang gasa nga kita naglipay na tungod sa misteryo sa iyang Pagkahimugso, aron mahikaplagan niya kitang nagtukaw diha sa pag-ampo ug mahimayaon sa pagdayeg kaniya.

Ug busa, uban sa mga Anghel ug mga Arkanghel, sa mga Trono ug mga Dominasyones, ug uban sa tanang panon sa mga Kagahaman sa langit, kami naga-awit sa imno sa imong himaya, diha sa walay hunong nga pag-ingon:

Santos

K: Santos, Santos, Santos nga Ginoo, Dios sa kagahaman. Puno ang langit ug yuta sa imong himaya. Osana sa kahitas-an. Dayegon ang nagaanhi sa ngalan sa Ginoo. Osana sa kahitas-an.

Pag-ampo sa Eukaristiya

(Human sa konsagrasyon, ang aklamasyon:)

P: Kini ang misteryo sa pagtoo.

K: Luwasa kami, Manluluwas sa kalibutan, kay pinaagi sa imong Krus ug Pagkabanhaw, gipalingkawas mo kami.

(Sa pagtapos sa Pag-ampong Eukaristiko, ang pari moingon:)

P: Pinaagi kaniya, uban kaniya ug diha kaniya, gihatag nganha kanimo makagagahom nga Amahan, diha sa kahiusa sa Espiritu Santo ang tanang dungog ug himaya hangtod sa kahangturan.

K: Amen.

Rito sa Pangalawat

P: Karon mag-ampo kita sa Amahan, atong gamiton ang mga pulong nga gitudlo kanato sa atong Manunubos.

K: Amahan namo, nga anaa sa mga langit, pagdayegon ang imong ngalan, umabot kanamo ang imong ginharian, matuman ang imong pagbuot dinhi sa yuta maingon sa langit. Ang kalamon namo sa matag adlaw, ihatag kanamo karong adlaw ug pasayloa kami sa among mga sala, ingon nga nagapasaylo kami sa mga nakasala kanamo, ug ayaw itugot nga mahulog kami sa panulay hinonoa luwasa kami sa dautan.

P: Mangayo kami kanimo, Ginoo, nga imo kaming luwason sa tanang dautan. Hatagi kami sa kalinaw niining panahona, aron, tinabangan sa imong kalooy, mahalikay kami kanunay sa sala ug mahilayo sa tanang kasamok, samtang nagapaabot kami nga malaumon sa pagbalik ni JesuKristo, among manunubos.

K: Kay imo man ang ginharian/ ug ang gahom ug ang himaya/ hangtod sa

kahangturan.

P: Ginoong Jesukristo, nag-ingon ka sa imong mga Apostoles, “Ang kalinaw ibilin ko kaninyo, ang akong kalinaw ihatag ko kaninyo.” Ayaw tan-awa ang among mga sala, kondili ang pagsalig sa imong Simbahan ug sibo sa imong kabubut-on hatagi kami sa imong kalinaw ug kahiusa, Ikaw nga buhi ug hari hangtod sa kahangturan.

K: Amen.

P: Ang kalinaw sa Ginoo sa kanunay maanaa kaninyo.

K: Maanaa usab kanimo.

P: Ipakita ta ang atong panag-inigsoonay.

Kordero sa Dios

K: Kordero sa Dios nga nagawatang sa mga sala sa kalibutan, kaloy-i kami. Kordero sa Dios nga nagawagtang sa mga sala sa kalibutan, kaloy-i kami. Kordero sa Dios nga nagawagtang sa mga sala sa kalibutan, hatagi kami sa kalinaw.

Pangalawat

P: Kini mao ang Kordero sa Dios nga nagawagtang sa mga sala sa kalibutan. Bulahan ang gidapit alang sa panihapon sa Ginoo.

K: Ginoo, dili ako angay nga mokalawat kanimo, apan ipamulong lamang ug mamaayo ako.

Antipona sa Pagpangalawat:

(Tan-awa Is 35:4)

Sultih ang mga nagluya ug kasingkasing: Paglig-on ug ayaw kahadlok. Tan-awa, ang atong Ginoo moanhi, ug iya kitang luwason.

Pag-ampo Human sa Pangalawat

P: Mag-ampo kita: Nangaliyopo kami sa imong kalooy, Ginoo, nga kining diyosnong pagkaon makahinlo unta kanamo gikan sa among mga kasaypanan ug mag-andam kanamo alang sa mga umaabot nga mga pangilin. Pinaagi ni Kristo among Ginoo.

K: Amen.

Katapusang Panalangin:

P: Ang Ginoo maanaa kaninyo.

K: *Maanaa usab kanimo.*

P: Moduko kita alang sa panalangin: Hinaut nga ang labawng makagagahum ug maloloy-ong Diyos, nga pinaagi sa iyang grasya kamo nagtoo sa Unang Pag-anhi sa iyang Bugtong Anak ug nangandoy sa iyang pag-anhi pag-usab, mobalaan kaninyo pinaagi sa silaw sa Adbyento ni Kristo ug magpa-adunahan kaninyo sa iyang mga panalangin.

K: *Amen.*

P: Sa inyong pagdagan sa lumba niining kinabuhia, hinaut nga iya kamong lig-onon sa pagtoo, malipayon sa paglaum ug masiboton sa paghigugma.

K: *Amen.*

P: Aron, tiunay nga malipayon karon sa pag-anhing tawhanon sa Manunubos, kamo usab unta mahatagan sa bahandianong ganti sa kinabuhing tunhay sa iyang pag-anhi pag-usab nga mahimayaon.

K: *Amen.*

P: Ug ang mga panalangin sa labawng makagagahum nga Dios, ang + Amahan ug Anak ug ang Espiritu Santo, mokunsad unta diha kaninyo ug magpabilin diha kaninyo kanunay.

K: *Amen.*

Pagpanglakaw

P: Panglakaw kamo sa kalinaw, ug paglipay diha sa Ginoo kanunay.

K: *Salamat sa Dios. ■*

**Ang
Simbahan sa
Kabus, diha
sa
Gagmayng
Simbahanong
Katilingban,
magpuyo
sa bag-ong
Kasaysayan
sa
Kaluwasan
kon
malipayon
niyang ilhon si
Jesus diha sa
mga
Kabus isip
mga
alternatibo sa
Diyos.**